

四庫全書

集部

欽定四庫全書

耕學齋詩集卷五

明 袁華 撰

古詩 七言

李左轄菖蒲花

扶輿磅礴鍾草木
粵有靈苗根踪蹙
下嵌崖竇嗽飛瀑
澤沐沆瀣煦初旭
寸十二節色縝綠
厥石昌陽葉上矗
凌傲霜雪氣芳郁
審能食之面如玉
嵩丘之人衣朱襦

翩然而來輸國粟挾以盤杆湛清淑雲根堅固歲不刊
花如車輪光皎然素榮英英秀而妍內秉貞白外嬋媛
見之者昌壽綿延飛行八極生羽翰豈但明目能引年
世人不信空自捐吁嗟相國仁且賢再拜上供紫皇前
為霖為雨蘓煩捐

長平戈

長平戈頭土花碧長平城下坑降卒將軍戰骨化黃埃
此物尚隨鉏耰出識銘漫滅蛟龍形猶帶征人燐血青

也知在德不在險四海承平安用兵

送鄭九成汎海北上兼東秦希魯

萬斛龍驤舟輪粟轉遼海若不浮日華五色散霞彩滄
波齋渟如鏡明張帆打鼓春潮平南風十日踰萬里高
卧讀書船自行掾郎茲游冠平生飄飄逸氣凌蓬瀛之
罍縹緲海津近北瞻龍虎環神京張家莊頭酒初熟長
城城下垂楊綠當鑪燕姬二八餘手憂銀箏唱新曲舊
游十載一茫然落日相思夢寐牽寄謝橋門秦貢士何

時風雨對牀眠

毗陵許左司中秋對月席上次韻

毗陵中秋月色好清光散落千林表
烏臺御史紫微郎
一笑相逢即傾倒
瑤樓玉宇淨無塵
金粟吹香爽氣新
靚粧行酒誰家女
恐是天上乘鸞人
蹇予山林性疎散
不堪政比稽康懶
學書學劍一無成
豈解奔趨事生產
誰能褰旗夜斬關
斫賊手持龍爵銀
歸來獻馘長楊殿
奪取金印懸腰間

德潤堂為袁仲博賦

封禺之山仙所京石室金堂秘瑀封當塗丈人居其中
乘彼白雲朝帝鄉上陳唐虞登俊良決以厚澤覃遐荒
善實斯積流斯滂諸孫濟濟承餘慶構堂崇岡脩中黃
服食太和飲天漿靈臺虛明道日充日華曜英澈八牕
誰其主之曰汝陽佩蒼龍精冠芙蓉天君泰然體凱康
稽首山立歌洞章岳祇川后翼兩旁千秋萬年鎮茲堂

題顏悅堂孝禪圖

堂背護華黃鵠背堂下江波流瀾瀾白頭阿母在庭闈
寸草春暉感游子顏師僧中學禪解談空憶得離家時
屋頭霜葉繞紅紫白雲英英度婁水迎母南來奉甘旨金
縷賜衣光纚纚獻壽稱觴母心喜越州剃髮睦州屨千載
高風差可擬初日照青桐啞啞語慈烏念母不復見粉
墨間新圖君不見東家甲第連朱樓千金買妾樓上頭
箏笛琵琶間箏篴俾夜作畫肆盤游婦姑勃蹊兄弟仇
讐言不顧父母養而令父母憂顏師顏師曾閔憐烏乎顏

師顏師曾閔儔孝禪之書魯春秋

完顏巾歌

完顏巾金粟道人所製寄鍊崖先生先生賦長歌以
謝率予同作

混同江流長白東完顏虎踞金源雄身如長松馬如阜
蹴蹋黃龍城闕空鴛鴦樂上鴛鴦雪春水秋山事游獵
黃河清後聖人生一代衣冠烟霧滅瑞玉龍環四帝巾
柘袍吐鵲裘麒麟錦房均藥大於斗驂駟坐擁真人

傳自中原文獻家全勝白氎小烏紗金粟道人髻已禿
挾以雙環歸鍊崖鍊崖先生面如玉繡縷盤花簇朱襖
鷓鴣小管沸箏琶春流銀鑿蒲萄綠日日倒載高陽池
落花漂搖風滿衣九峰女兒拍手笑月中蹋歌歌大隄
先生醉筆蛟龍走報以長歌意殊厚脫巾花底一掀髯
笑倩柳枝來漉酒

趙仲穆遊騎挾彈圖

代作

開元少年意氣雄任俠不數陳孟公文犀帶束鵠袍小

驕馬颯沓如游龍側身仰望日麗麗為有流鶯在高樹
兩騎聯翩未敢前看送金丸落飛羽白頭烏啄延秋門
漁陽塵起天地昏珊瑚寶玦散原野空令野客哀王孫
平原公子五色筆俗吏庸工俱辟易寫成圖畫鑒興衰
未必奢淫不亡國

白頭母歌

次韻徐孟岳

白頭母少為倡家女老作種花婦短布單衣纔掩股猶
記青年學歌舞櫻桃花發當牕櫺藝成北上鳳皇城不

與長川教坊伍耶孃輕義重金珠婚娶論財漫相許失
身為妾權豪門背立銀釭泣無語主家三入相中書萬
騎雲趨當要路馬前鷹犬亦遭時門下桃李自成蹊共
工一觸天柱折舞衫歌扇都分攜放還仍飲鄰姬茶弟
妹凋零無一家嫁得湧金門外壻不解耕田能種花錢
唐大家羅檢刮救死奚暇誇驕奢秋風荊棘迷花塢充
募新軍隸分府別時血淚萬行啼信州城下出征西前
夫後壻何翕忽貴賤同為道旁骨閉門花落清明雨夢

尋舊譜移箏柱覺來無地覓夫骸悔不身先木蘭去

至正己亥冬客杭有客持毛襪去久不見還因戲

賦以自解

領軍家有一屋鞮東郭先生雙破履我家舊物值偷兒
赤脚端如玉川婢革鞮骨立寒無藉風霜凍皴皮肉死
綫材寸短無所長浮世榮名輕弊屣鵝毛縫罽將奚施
龜背刮毛徒爾為係帶難令釋之結噉雪可憐蘓武饑
松牕朴渥久不至褚衾暖餅空自隨北來甕根如瓠肥

氎毛蒙茸光陸離金刀細剪雪花落成氎足可供驅馳
人生能著幾兩屐畏涂巉崿半榛棘何似山東李謫仙
酒酣雲卧游八極

來龜軒歌為顧仲瑛賦

昔日辟地商谿頭長涂風雪同放舟登樓見月思鄉淚
坐石觀雲憶弟愁落花芳草青春暮歸時喜躍來時路
入門梧竹兩青青園池樹石還如故中庭有物狀若能
巖巖踞石臚生苔相驚左顧一笑粲乃是河伯使者清

江來重門扃鐫嚴且密曳尾泥涂何處入固知異物神
所登却勝余且網中得吾聞靈龜壽綿綿揜牀一息三
千年從游鳳麀郊數外會合龍虎風雲前舉目烽烟徧
區宇巷陌銅駝委榛莽玉山佳處屋鱗鱗鶯花春滿辛
夷塢道人當軒寫來龜邀我為作來龜詩蹇予材薄不
能賦願爾子孫金印懸累累

射魚行

東海大魚鬚鬣赤首昂洪濤數千尺鋸牙鑿齒鏡夾眸

噓氣雲蒸天地窄惡蛟毒鱷垂饒涎射工黃能相后先
環以鼉甲鳴鼉鼓白日出沒清冷淵前年吞巨艦哆口
大江裏今年取渴虎掉尾南山陟任公投轄不敢釣刺
史移文詎能徙伏波將軍虎豹姿先驅陽侯后馮夷三
千强弩水犀手海魴龍驤銜尾來天吳罔象俱辟易黃
間機張聲霹靂箭迸流星一點飛暴額推腮肝膽瀝皇
仁如天被海宇蠢爾恣睢自貽感將軍奏凱登瀛洲取
封疆鯢高若丘燭龍飛出天下白滄溟洶湧今安流君

不見枯魚過河泣肉棄泥沙螻蝻食寄謝平頭黃帽郎
慎勿操兵取誅殛

柳風蓉月亭次缺崖先生韻

綠烟紅霧搖蘭塘嬋娟泣露啼秋芳金蟲撲帳花風熱
花底雙歌蹋明月畫闌十二懸晴虹美人香骨燕支紅
滿眼春嬌小蠻舞雲錦書傳青鳥語亭中主者江左客
春草夢回天下白

鄭明德先生賣壽器以贄堦玉山道人復贈一棺

賦詩以謝邀予次韻

山人右臂枯有稜日耕研田耘剡藤祇今年已六十五
感時念舊身凌兢文章海內鳴當日老病窮愁如蝟集
子亡女長當贅壻無錢賣棺情宜恤江空木落西風高
短衣破屋驚搜牢相逢玉山淚流霰老我太平難再遭
玉山重義急水火為製柁木棺若蠶得纏裹便呼老僕
荷鍤隨醉死何妨即埋我君不見北邙山荒墳累累白
草間積金何如積陰德黃鳥能致三公環

北山寓興

北山之中春載陽膏雨霏霏草木長谿蔬野蕨青戴土
老饕採擷充枯腸枸杞黃凝鞠道熟萋蒿青點片羹香
步尋木雞竹風冷手拾茵釘松露瀼蕨拳敷腴竹萌嫩
韭木豐肥同芼薑鼈裙鵝掌俱退舍牛炙豚蹄難擅場
春光爛熳過三月靜愛幽香生野芳寒具藤花甘勝肉
涼餅蓼芽圓截肪槐葉光浮素盃凍含桃花暝清尊涼
石芥鼻觸氣辛烈金齏齒嚼聲宮商不蒙朱門貴介錄

獨許白屋幽人嘗物無定味貴適口冰壺先生真欲狂
萊公萬羊數已定庾郎三韭貧何妨分羹不均御者怒
染指未食天倫戕驕奢淫佚古所戒口腹累人良可傷
山中之樂樂無央秋風又到蓴鱸鄉菊黃橘綠萸蟹紫
桂酒新篘香滿觴菜園不愁羊蹋破便當爛醉眠糟床
雖然此腹久負我結交歲暮母相忘

再用韻懷錢塘舊游

憶昔南游浙水陽越山青映吳山長青鞋阜帽紫筇竹

躋跋鳥道登羊腸
葛翁嶺下丹井冷
西子湖邊花草香
螭頭畫舫載歌舞
醉歸零露何瀼瀼
幻仙時居靈石塢
清齋遠致霜前薑
酒闌嘻笑即揮灑
筆陳酣麇文藝塲
騎鱣上天雖不返
潛德百世猶流芳
柳洲數過拾遺宅
繞屋清泉甘若肪
湖南憲幕官不調
一別四見秋風涼
顧瞻停雲動遐思
落落端如參與商
欲謀斗酒恣歡譁
感念死生安忍當
山陰狂客老更狂
舟楫欲來道里妨
黃塵閭天尚格鬪
島夷峒蠻相奪戕
可憐殺戮到雞狗

今我不樂心孔傷興亡治亂固有數流毒海內誰遺殃
眼中之人美無度安得放浪來江鄉時維清和白日永
谿毛采掇供壺觴並游英俊屢入夢夢覺明月流空牀
但當痛飲醒復醉驩樂悲哀俱兩忘

題美人汲井養花圖

荳蔻鶯啼瑣牕靜御柳條長拂金井美人初試薄羅裳
翠袖雙擎玉壺冷璫樹花開壁月圓一枝折得浸紅泉
莫教野鹿偷銜去狼籍香囊蜀道邊

紀行歌送陳士惟新喻教授

陳廣文短而精悍才且雋投老遠之新喻任中流揚舲
張大颿烏帽霜華點秋髻憶別楚鄉今十年夢想江山
動游興憶昨經覽初看山數去程放舟婁江口挂席南
風輕長年三老椎大鼓醜酒割牲祈降靈開頭振柁入
揚子東望淮沙海門紫鯨魚吹浪波冥冥不覺狼山去
如駛舟行三日數百里忽見金焦屹相峙鐵甕城額壁
壘荒百戰英雄嗟已矣曉行朱金沙暮泊石頭城不聞

商女歌玉樹黃蘆苦竹生秋聲復沂彭郎磯還經敷淺
源落颿官亭湖遙見香鑪烟却憶儀真不數日行盡長
江十三驛大孤雨晴冰鑑開白石青林暎行色始離墟
落見城市高閣巍巍對山起摩鐵柱弔旌陽俯仰清風
懷孺子三洲橘熟秋雨霜楓林點染兼丹黃烟華萬井
照金碧石城百雉圍清江范太史清江生視草登紫閣
看花游玉京子今往彼我歌紀行范公雖仙典刑在山
川草木皆知名醉歌擊唾壺君毋憂問涂安得成寬輦

寫作長江圖

遊惠山寺

蒼山蜿蜒蟠九龍石泉混混沄其中下灌吳田數千頃
澤物豈止煎茶功支分餘潤及草木松栢青蒙茸
只今無錫天下濟鍛冶不復炎烟紅鼉鼉羣嘯叢祠空
遺像者誰桑苧翁波泉酌地薦蘋藻俯仰千古懷清風
靜安堂為婁下徐氏賦

婁江東下經昆丘上有新堂河渠渠軒榮窈窕通綺綠

卷五
挾以槐柳羅前廬堂中之人美而脩集芙蓉裳紫霞裾
心不妄動安無虞誰其主之曰姓徐女紅麻象子治書
豐年多忝仍多稔視彼利欲爭紛挐嚙啗權門足次且
何如靜安安厥居汝陽作詩置座隅勗爾朝夕勤劬劬
毋縱逸樂荒于嬉審能行之寧爾軀

耕學齋詩集卷五

欽定四庫全書

集部

耕學齋詩集卷八

六至

詳校官庶吉士

臣龍廷槐

中書臣劉源溥覆勘

總校官進士

臣繆琪

校對官編修

臣莊通敏

謄錄監生

臣莊文煜

欽定四庫全書

耕學齋詩集卷六

明 袁華 撰

古詩

七言

復鄒忠公墓為謝子蘭賦

有宋開國三百年聖君哲后登才賢內無呂賈武韋祐
昭憲流裕遠且綿宣仁垂簾輔哲廟初政彷彿元豐前
奈何權奸妨國命黨籍忠良俱左遷紫宮正位儼宸極

豈假巫祝循私偏非言構獄詞具奉詔廢作瑤華仙
謀之者誰郝內侍卯金刀氏相夤緣元符授冊立為后
奸臣揣摩機已先維時忠公居諫省從容奏對言便便
屬比祥符永平事春秋大義星日懸孟后既廢不可復
劉豈得擅中宮權遂良還笏為斥武好禮上書因諫玄
忠言逆耳竟遠謫徒步獨上新州船貞哉賢母成子志
身落瘴鄉甘棄捐端王嗣位肆大青放逐兩載蒙生還
尋復正言轉司諫三守劇郡親蕃宣俄承天語詢諫草

云付烈燭飛炎烟偽書一出那可辨再由衡岳移瀛川
澹山寺中啼恠鳥仙宮嶺下流清泉精誠端能動天地
神物衛護非偽傳豺狼載路尚猖獗脫身虎口仍顛連
放還未幾瘴癘作一病不起寧非天僅存餘息見故友
言以國事猶拳拳公也程門弟子列存心慎獨功彌專
思陵贈謚發潛德已死奸諛應凜然常州城北十里許
高墳累累官道邊政和迄今二百載子孫散落犁為田
牛羊暮下蒿棘滿淚落行路興哀憐謝君忼慨當世士

金匱要略卷六
獻書天府言數千建祠復墓限樵牧新松穉竹清陰圓
嗚呼章蔡終貶竄同惡豈能謀自全青山門外一坏土
尚有諸生加豆籩忠邪猶來難並立不信請視思賢編

匡山歌送恢復初上人

有美人兮思匡山歲云暮兮道險難江空積雪濤波若
山立駭慘慄兮凋朱顏邀芙蓉於五老兮悵飛瀑之潺
湲顛崖絕谷以晻靄方翼層霄而高舉如翥鳳而騫鸞
長松幽蘭芊綿野芳鳥道百折上捫翼軫不得窮躋攀

鶴夜怨而寡侶遲夫君而未還山川搖落兮老冉冉而
懷土歌匡山兮將歸望孤雲於極浦嗟昔人兮既遠訪
遺蹤而覽古社結蓮以植花林賣杏而守虎驅飛錫兮
踰險阻雲為扉兮月為戶攜匡山兮招應真飯松花兮
飲石乳展丹屏之九疊沂銀河之三梁閱瓊經於戶室
採金芝於珠房霞氣朝潤天光夜明養貞素於恬澹兮
聊消搖以徜徉嘒鳴鳳之不至胡衆鳥之高翔虞弗
仁駕駘以良榭樗枿桂用狼牧羊彼方以蹠躋之為潔

廉兮又奚慕乎夷齊採薇於首陽賦歸來兮彭澤懷高
士於南昌清風至節照今古吾將尚友于斯人兮歌濯
纓於滄浪瞻白雲兮思君何山高而水長

野老移家圖為謝子蘭題

野老移家向何許廼在吳松之甫里治生擬學陶朱公
釣竿欲覓玄真子小兒讀書坐船頭大兒擊楫歌中流
細君斫膾婦炊黍老子醉卧蘆花秋人生真樂不易得
兒女團圞居澤國避秦何必問桃源朝泊江南暮江北

分題得雪夜擊蔡

蔡州城中盜弄兵蔡州城外皆行營
洮河將軍猛如虎奇材盡選山南英
夜龍張瓜天雨雪大風偃旗膚欲裂
銜枚發刃毅弓行洄曲朗山道俱絕
懸瓠城多鵝鷺池擊之使鳴敵弗疑
健卒前驅坎墉入假柝傳夜聲遲遲
黎明雪霽城已墮尚詫兒郎求褚衣
白袍單騎降帳下渠魁檻送來京師
受俘獻廟歸飲至文章千古平淮西
雪巢雪暎梅花白玉盃香醪凝琥珀
英雄豪傑無時無

莫笑出門天地窄只今汝蔡起風塵千里荆榛犬食人
安得將軍提寶劍剪平大慙慰生民

白雲樓歌次韻文學古

白雲樓居深復深道人燕坐雲為心未逐神龍澤天下
時從倦鶴栖巖陰玉氣虹光射虛牖天逼闌干挂牛斗
始信桃源隔一塵世人只許聞雞狗君不見茂苑長洲
荒草裏豪傑銷沉呼不起功成身退去者誰一棹鷗夷
渺烟水又不見秦川公子走干戈龍顛虎倒奈渠何落

日憑高望鄉國愁懷借酒生春和世事興亡等飛絮難
挽黃河水西注御風八極恣遊遨歸去還依白雲住

靈壁石魚磬歌

靈壁石魚磬房山高公所遺杜南谷真人者後歸開
元王谿月迨谿月歿南谷之孫丹丘復得之鏤崖楊
先生誌其事汝陽袁華為作歌曰

鯁公潛跡淮泗淵禹門燒尾凌風烟未隨磬囊蹈東海
先從琴高遊九天天家披腹星磊砢帝遣下主芙蓉仙

賜恩三品甲之上黃金寶帶腰間懸俄逢穀城丈人怒
遷謫乃居靈壁顛補天不值女媧氏支機徒傳博望騫
蒼顏綠髮嗟老矣時同樵牧雲根眠故交相國牛與李
後之繼者惟米顛相逢傾蓋即下拜握手話別經千年
塊處山林返初服窮探理窟加鑛研房山胸次有丘壑
萍水儷結三生緣間厠笙鏞列堂下五音繁會聲相宣
歲暮栖遲南谷口日與琴劍相周還飛鳬葉縣覽谿月
一往不復寧無愆通玄真人素有約招之歸老丹丘田

具區澤中訪范蠡計籌峰頂尋辛鉏延平劍去亦異事
合浦珠還非偶然千秋翁仲荒草裏萬歲艮岳寒蕪邊
感今慨古重太息人亡器存良可憐君不見贊皇平泉
醒酒石子孫世寶稱其賢

映雪軒

朔風捲地地欲裂黃雲漲空江水竭素娥驂駕萬娉婷
紛舞霓裳下瑤闕華屋酣春暖圍肉汎螳浮羔呌橫玉
錦帳沅蘓犀辟塵胡蝶交飛夢魂熟老康懸鶉肌起粟

竹素園窺鬼夜哭青藜無烟沉燭龍萬壑清冰眩雙目
方諸露吸孤蟾精冷光倒射玻璃明碧紗籠烟照芸葉
鈞天九奏簫韶鳴蟬聯簪組桐城族堂下珊瑚森列竹
軒開虛白境闋寥爽座粉香飄萼綠玉盃龍團捧纖指
狐裘蒙茸據烏几醉援毛穎傳冰壺笑殺清狂回剡水

寄題吳興任孟暉谿山春曉畫壁

我家苕谿山水窟流寓婁東歸未得前年避地到鄉間
親戚歡迎慰岑寂長橋崢嶸勢如龍下飲大谿垂渴虹

先人舊業桑梓在石田數畝松亭東南望羣峰奔萬馬
森森鷗波連若下桃花夾岸放漁舟疑是仙源問津者
謝家客兒有髮僧俊爽捷若秋空鷹有時清唱醉花月
有時趺坐談三乘結樓高倚雲松杪門對谿山春日曉
誰人粉壁寫成圖索我題詩故相惱謾歌谿山春曉歌
安得杖屨同婆娑為詢舊業在谿潁穉松叢桂今如何
送繆生之錢唐省親

繆家郎目爛巖電光金線衣蟠柳色黃紫荷囊佩玉鈎

長暮朝讀書不下堂宛若丹山雛鳳凰吳城一夜兵戈
入老幼蒼黃計安出搜牢幸得此身存翁媪信音何處
覓青天蕩蕩日重光太行可梯滄溟可航不愁水有蛟
鱷道有虎狼舟遥遥指錢唐舞斑衣稱壽觴和樂洩洩
氣洋洋君不見東鄰老翁金滿埒骨肉凋零子孫絕人
生貴在親目前萬里封侯奚足言

拜石壇歌

顧君仲瑛所藏湖石上有蘓文忠公題名後復獲公

快哉亭帖追一時物也乃命朱珪摹刻于石因丹丘
柯博士嘗拜之白野監憲公題曰拜石壇仲瑛邀予
作歌紀之

眉山三蘇宋儒宗長公矯矯人中龍南遷儋耳西赤壁
文章光焰超鴻濛快哉之亭雪初霽領客登覽山川雄
自言平生不解飲胡乃一舉觥船空和詩寬限見真率
鑿崖題石磨蒼穹功名富貴等丘土斷碑殘素垂無窮
吁嗟異物神所衛玉山合壁俄相逢奎章博士丹丘翁

江南放逐驚秋風見之即下朱帟拜二顛痴絕將無同
築壇山中加愛護樹以松桂連椅桐雨牕雲戶濕寒翠
朝闌暮檻開晴紅白野御史龍頭客青年獻賦蓬萊宮
戲將禿穎寫螭扁斷釵折股星流虹祗今烽烟閤河岳
王侯第宅皆蒿蓬牙籤玉軸映竹素好事獨傳吳顧雍
婁東朱珪鍊作畫字字玉屈盤蚪蟲嗟哉昔人今已矣
慘澹故國風烟中如何二子復嗜古策勲翰墨收奇功
我來再拜重太息蒼蒼古雪吹長松登壇絕叫浮大白

酒酣目送孤飛鴻

戲簡彥栗

錢唐湖邊春日暉
鄧家蠻娘金縷衣
向人凝笑語嬌澀
陌上花歌緩緩歸
伯勞東飛燕西去
惱公無限相思意
有約荷花莊上來
紫鸞笙裏留春住

美人刮瓜圖

蛺蝶雙栖護草花
輕衫新試方空紗
髻斜髮鬢不復理
小鬟初進青門瓜
昆刀未截瑞玉璧
手奉瑛槃倦無力

嚼破紅冰如蜜甘誰解黃臺語悽惻

玄門草閣歌

吳淞江北丘虛南壤土沃衍泉水甘宅幽據勝得佳處
乃是玄門之草閣閣中主者貌奇古昔曾騎從將軍府
錦繡樓臺劫火餘豪傑銷沈化黃土一葛兼一裘歸從
赤松游采芝行引鶴賣藥或乘牛得錢沽酒澆牢愁挽
之那止輒掉頭霸陵醉尉不訶問烟波釣徒相倡酬草
閣足佳致當牕崑玉峙流雲度松顛飛泉鳴竹裏可以

燒凡鉛鼓素琴屏三彭戲五禽漁樵或爭席利祿豈關心斯時斯境不易得按圖便欲窮幽尋登真隱訣儻相與遲汝鸞笙縣圖岑

劉孝子行

豐城孝子身姓劉年始十三復父讐天子臨軒親顧問再拜階陛重叩頭臣父出宰海上州奉宣德化紓民憂民有大猾曰蔡某作官鄉里仍行賕交私察佐構間隙妄陳大府誣罪訛使者巧詆遂致法遠謫煮海為羈囚

臣甘解衣伏斧鑕願白父秩寬之由詔下執法復慮問
主謀梟首餘皆僇嗚呼孝子罕匹儔太倉少女差可侔
更請長纓係強虜策勲萬里歸封侯

夢綵堂為余士平提學賦

綵服染緇塵游子遠辭親游子綵服敝恩賜朱衣新曉
衝燕山雪問程揚子津西望不見匡廬雲江南已老鶯
花春食寄吳下旅旅館燈昏夜身逐一蓬飛心隨孤蜨
化阿嬈倚門遲子歸奉觴拜舞趨慈闈堂陰護花大如

斗堂下玉樹森成圍子歸何草草母樂亦融融俯眎兒
身衣猶是母手縫慈烏擇木思返哺啞啞悲嘯近堂樹
空梁月落夢回時此身有媿南飛羽

送印月潭歸穹窿山

春草徧南陌春潮流落紅美人婁水上一舸逐東風一
舸向何處言歸故山去雉鳴苦竹岡離情黯烟樹故山
穹窿高插空重湖倒浸金芙蓉縹緲寶樓林壑中晴嵐
暖靄霏簾櫳三年不蹋虎谿路夢禮大士青蓮宮風景

既不殊山川宛如昨為問鷗夷舟何似支硎鶴安得相
從訪二公醉躡丹梯倚寥廓山崖乳蘭芷芳臨谿采擷
煩寄將相思引領天一方載歌招隱為報章重來握手
成大笑楊柳花飛春筍長

雲西老人春山平遠圖

雲西老人富文藝博聞好古無仕志我雖不識嘗夢之
矯矯丰姿髯磔蝟馭風騎氣上釣天斷縑尺楮人間傳
點染彷彿營丘李重岡複嶂孤雲邊谿頭春還雨新足

灌木蒼蒼柳將綠
漫郎刺舫何處去
待向前村借書讀
人生富貴如秋烟
草木同腐良可憐
老成典刑不復見
展卷題詩心惘然

分題得南武城送顧仲瑛之濠梁

南武城在婁水闔閭昔築候
越兵檣李兵交竟傷指夫
差一戰雖復讐嘗膽毋忘會稽耻
大夫種至請行成屬
鏐卒賜忠臣死爭長黃池盟
寧知甬東徙南武城城已
墮我來覽古仍賦詩棠梨花
落雨絲絲遊子西行何日

歸悵望不見令人悲

高房山雲山圖

尚書高公寫山水神妙深造董與米想當解衣盤礴初
雲氣淋漓落生紙憶昔故都全盛時大藩冠蓋羅熊羆
春明幕府文字簡緩帶輕裘信馬歸湖上青山龍鳳飛
五雲特立何巍巍陰晴朝暮多變態點染粉墨歸毛錐
嗟予生晚徒企慕不獲從容陪杖屨小牕展卷記曾遊
彷彿初陽臺下路谿回略約號驚湍松山漠漠生晝寒

仙翁丹成已長往空留館宇瓊林瑞三邊烽火埋黃霧
夢墮湖山未能去雞犬相隨欲問津避地桃源在何處

贈李擴

蒼頡史籀世既遠斯冰徐張猶善書國朝傑出吳與趙
俗工紛紛譌魯魚如錐畫沙釵折股會稽嶧山化黃土
尚幸新泉丹井存更有吳興能復古鴻都石經劫火焚
蓬萊翻刻亦飛塵二碑屹立穎昌里字畫猶為人所珍
青城山樵虞閣老書法中郎名譽早蕭吳楊杜號升堂

昆吾金刀刻剛卯華亭李擴心好奇凡將尉律幼所師
商盤周鼓秦漢石臨摸掃禿千毛錐竭來相見婁江汜
鐵崖鐵限親曾履富兒金多招不行門外求書日成市慈
親倚閭思告歸歸去匆匆仍索詩嗟予潦倒丘壑裏遲子
銘功書鼎彝

張師夔關山行旅圖

青山盤盤樹簇簇岡巒縈紆路詰曲長橋如虹橫絕谷
崩崖中斷散雪瀑客子出門霜滿屋石磴犖确驢轂鯨

谿頭待渡人立鵲烟水微茫漾初旭東窮滄海西岷峨
梯板鳥道航鯨波重樓複閣岩之阿安得稅駕同婆娑
夔翁八十雙髻皤飲少輒醉醉輒歌泉南漫仕廿載過
不歸奈此谿山何

怡雲閣

甲申歲閏張貞居先生過予婁江之書樓偕行則句
曲周本原也二君先後蛻去今已廿載矣周之仲曰
致和以予與其伯兄有一日之雅遣姪虛白來徵怡

雲閣詩雖未及識而義不可辭敬賦一解併致懷思
二君之意云

句曲周仙館茲山多白鵠積雲盪胸起層霄紛郁郁卷舒本
無心成蓋復輪囷五色散晴采三素墮寒影朝隨白鵠積金
峰暮逐神蝙福鄉井山中宰相挂冠歸身似閒雲豈受羈不
堪持贈賦詩寄變化靜觀聊自怡商之孫子清廟器靈笈琅
章發玄秘飛閣馮虛杪萬松陰合牕扉凝玉氣貞居先
生楊許儔曾過婁江江上樓論詩秉燭坐清夜傾蓋始

識髯翁周我亦華陽洞中吏不歸已是三千歲西訪髯
周弟與孫為覓怡雲當少偈

送友人興化衛幕

六月入閩關榕陰夾道涼鷓鴣飛鳴苦竹岡一重一崦
山蒼蒼雲山蒼蒼馬前起南往莆田尚千里乾魚望祭
武夷君考亭肅謁朱夫子九仙委蛇海上來挾以鳥石
何魏哉黔黎久沐常衮化野花自發閩王臺候吏立江
許小隊前負弩高城屹屹擁諸胥太府潭潭列貔虎稅

駕趨蓮幕考籍閱我師時平簡書靜覽古還哦詩端明
古遺直夾漈富著述子孫雖為庶遺跡猶可覓亦有護
法之善神竊弄威柄痛生民忠邪同歸一坏土耿耿信
史書奸臣送君莆田去興懷歌短歌登高儻有賦馳寄
莫蹉跎

蘓小小像

錢唐江中濤似雪錢唐湖頭好花月錢唐女兒蘓小小
艷質清歌兩奇絕紗牕夢回春已深黃梅雨潤越羅衾

髮髻結偏倦梳掠袖攜檀板愁縈心冶容誨淫古所鄙
千載尚猶傳畫史却憶當年桓少君鹿車共挽歸鄉里

送吳敬德之濟寧

黃河冰泮春水生張颿沂流三日程買魚酤酒入閘去
柳岸桑畦曉早鶯歌風臺前塵眯目道路征車聲輾輾
祇今邊徼靜烽烟百丈繹舩隨處宿濟州城下舊曾遊
少年歷覽今白頭秦碑漢碣尚壁立大書深刻蟠蛟虬
太白酒樓高百尺東望青山是鄒嶧市井雖經劫火餘

風景不殊還似昔送君婁曲柳色濃大船過鼓聲隆隆
歸涂擬蹋梅黃雨莫待霜林棗子紅

張谿雲耕讀圖

雨過青山麓谿流漲新綠麥熟雉將雛桑老蠶上簇荷
鉅朝出耕釋耕還讀書行行負薪誦咄咄帶經鋤門無
石壕吏戶有卑卓壻客至輒傾嘗嬉笑襟嘲諷此非桃
花源乃是朱陳村兒女畢婚嫁含飴弄諸孫于戲髯張
非畫史才比中郎亦無子空留遺墨在人間竹屋荒涼

月如水

贈劉宗永

曹魏製墨推韋氏後來獨數南唐李李家父子藝絕倫
徙居歙嶺由易水膠煮鹿角松花烟釵脊小餅雙龍騫
堅能削木黑點漆好事寶藏今尚傳蒲潘郭葉宋諸子
姓名班班書墨史近代西江朱萬初龍香上貢奎章裏
嗟予老病卧山林時磨破硯臨來禽清晨有客叩戶入
手抱豹囊操楚音自言家本廬陵住金粟岡頭釣遊處

南窮五嶺北燕然
瀕洞風塵未能去
少年結客輕公侯
五陵豪俠同追遊
黃金散盡黑貂敝
空餘老氣橫高秋
却埽烟煤開甕牖
柸汁和膠審時候
丹砂紫沈腦麝金
萬杵春雷鳴鏡臼
一螺玄玉瑩無瑕
時時抱送文章家
得錢酤酒開小口
醉蹋明月歌烏紗
我聞此語重感慨
兵後高門幾家在
繡衣紈袴走亂離
無術終填溝壑內
只今車馬四海同
大船撾鼓揚輕篷
西泝宮亭過章水
投老還鄉誰似公

鶴瓢山房圖

鶴瓢山房大隱所居乃在泰伯三讓里雖道迫塵市山
林如鶴瓢仙者玉為質紫髯蝟磔目點漆小謫人間甲
子初那計緱桃幾偷喫丹成不肯獨長生時施狡獪蘓
罷民金鉞幻作黍珠境跛痾積逮皆能行既識鶴瓢勝
按圖入冥想彷彿得要領長藤古木路迂回飛泉落澗
聲喧阗不放落紅隨水去恐引辟地秦人來鶴可騎瓢
可酌酌罷縣瓢身上鶴世人仰望不可親謾謾松風號

萬壑

玉山草堂為沈南叔賦

東老草堂在何許崑玉峰前婁水陽恠石當門猛獸伏
長松繞屋神螭翔芸牕展卷聲琅琅若出金石諧宮商
嵩高山中隱者所浣花谿上詩人莊小亭野芳發幽香
鷗波淼淼涵天光南隣老翁覓酒伴短筇緩策行相羊
草堂之樂樂無央豺虎遁跡罔兩藏何人寫圖落塵世
乃是四明狂客老更狂烏乎四明狂客老更狂生紙潑

墨兀老蒼

杏花金羽圖

盈盈繡杏花團雪穠艷飄香春正月繡幙低垂護曉寒
金羽枝頭巧調舌風流詞客太多情花中吹笛到天明
援毫起草江南賦粉墨經營為寫生

太真睡起圖

博山烟銷沉水香昭陽殿中清晝長桃笙翠滑睡初熟
嫣然秋水芙蓉芳緒龍爪痕殷不滅寶鈿尚掩酥脣雪

漁陽鼙鼓驚夢還化作馬冤坡底血

耕學齋詩集卷六

欽定四庫全書

耕學齋詩集卷七

明 袁華 撰

古詩 七言

送朱道原歸京師

君不見范蠡謀成吳社屋歸來扁舟五湖曲之齊之陶
變姓名治產積居與時遂又不見子貢學成退仕衛廢
舉鬻財齊魯地高車結駟聘諸侯所至分庭咸抗禮馬

醫酒削業雖微亦將封居垂後世胸蟠萬卷不療饑孰
謂工商為末藝泉南有客陶朱孫大舶東望扶桑暎石
塘萬里限弱水貝闕珠宮光吐吞直窮南海極西海生
擒蠻寇龍牙門島衣卉服識名姓懋遷有無爭駿奔聖
明文德洽區夏詔遣移家居闕下親聆天語覲天言豈
是尋常行賈者茲來宴上督諸商會看重譯貢殊方明
珠撒殿獻琛賁天王端拱當明堂朱君朱君不易得務
財逐利通絕域只今太史筆如椽汗簡殺青書貨殖

趙仲穆幽禽圖

水精宮中春已深
雕鞍遊騎蹋湖陰
金丸不打返哺鳥
彩筆自寫孤飛禽
明牕斐几光相暎
吮墨含毫清晝靜
王孫不歸春草生
鷗波萬頃兼天淨

陪顧仲瑛祭張貞居回飲湖中分韻得奇字

連朝風雨不出戶
今朝雨晴山色奇
湧金門頭買畫舫
黎明徑度湖之湄
張公學仙靈石塢
藏書瘞劒荒山陲
丹成馭氣九天上
長松落日風颼颼
玉山草堂素有期

死生契闊良可悲
刳羊載酒拜祠下
俯仰今古興遐思
君不見附子岡頭
師相墓只今惟有
草離離

錢塘錢思復匡廬于彥成幼同筆研重會於願玉

山許思復賦詩邀予次韻

會稽外史玄都客
手校玉文坐瑤席
一別中岳三十年
谷媿林慙少顏色
白水真人冰雪容
曾訪廬鴻至寧極
翩然而來動遐興
飛適丹崖千丈壁
相逢忽在玉山中
不計人間歲年易
赤城霞外憶同遊
石洞桃花幾回碧

桑田變海海揚塵也知狡獪今非昔玉山八月秋正好
銀潢西瀉星虛直紫簫吹月酒如淮露華洗天天影濕
御風不作三山遊叅龍歸應西池役儻過金馬到玉堂
為我問訊衆仙伯

春暉樓牡丹

春暉樓前牡丹樹喜見新花發舊槎深根培植雨露厚
不待羯鼓花奴撾紫黃紅白緋與碧牙牌小篆蟠龍蛇
玉環飛燕兩傾國國色暈酒凝朝霞就中一枝最傑出

金鈴繡幄相籠遮前年作客浙水上去年避地苕谿涯
千葩萬卉自開落媿我不見空咨嗟今年花發風日麗
況無兵燹吹黃沙金尊美酒喚小妾起舞折花簪髻了
酒酣樂極重太息故人南北音書賒虎頭學佛宗三車
飲酒食肉談空華了知何必假外相始悟在家真出家
洛陽園池信可誇只今無樹嘯栖鴉玉山山中稱樂土
杳杳百里連桑麻詩成對花還大嚼一任白髮歌烏紗
盧伯融秦文仲同集湖光山色樓分題得陽城湖

海虞之南姑胥東陽城湖水清浮空瀰漫巨浸二百里

勢與江漢同朝宗波濤掀簸日慘澹魚龍起伏天晦蒙

陰淵雨昏火夜燭下有物恠潛幽宮度雉巴城乃其亞

以城石湖湖不同

度城雉城巴城皆湖名在崑山

想當黃池會盟後夫

差虎視中原雄東征諸夷耀威武湖陰閱戰觀成功陵

遷谷變天地老按圖何地尋遺蹤我來弔古重太息空

亭落日多悲風

湖之陰有村白夷亭吳王征東駐兵于此故名見吳郡志

虎頭結樓

傍湖佳牕開几席羅諸峰鳴雞吠犬境幽愛佳木良田

青鬱蔥魚舟儼若問津者仙源有路人間通時維端陽
天氣好故人久別欣相逢頗黎萬頃放舟入俯覽一碧
磨青銅恩賜終懷鑑曲客水嬉不數樊川翁蓴絲鱸膾
冰縷碎菱葉荷花雲錦重酒酣狂歌發逸興白鷗驚起
菰蒲中相國井堙烽火閣郎官水涸旌旗紅此中樂土
可避世一舸欲逐陶朱公安得列缺鞭乘龍前驅飛廉
後豐隆盡將湖水化霖雨淨洗甲兵歌歲豐

歲寒圖為孫惟善陳彥廉賦

九日山在泉州南安縣西唐秦系結廬其間注易老子有石茶竈碾具存時姜公輔以直諫忤德宗謫茲郡別駕始與系交過輒終日姜之卒也妻子在遠方為營塋茲山之麓秦年八十餘後不知所終宋初刺史陳洪進即其地為秦君亭因感其友義之薦以處士而塋故相故及之

泉南諸山何處區清原洞天仙所都赤明開劫風氣舒玉檢丹書闕神符重樓複閣山之隅鳥道百折非一涂

雲旂畫下猩猿呼鉤輅格磔唬鷓鴣松風謾謾吹笙竽
芝蘭蓀蕙春芬敷已且花黃荔子朱羽人飛行天為徒
或跨白鹿騎於菟俠以鸞鵠從雙鳬東窮弱水窺方壺
越有莆田列仙儒以鞭鞭石石受驅長橋橫波龍脊病
下通舟航上軒車流水一髮雲外孤蠻蜚出沒乘舳艫
南金大貝犀象珠川傾山積來委輸九日特立青蓮樹
秦君屏跡賈不沽閉門著述與世疎有唐宰相陳諫書
謫宦南遷鳥在笥室家既遠身乃瘡為卜茲山藏其軀

感懷友義增歎戲尚存茶竈亭已蕪山川清淑氣鬱
紆維孫陳君生絕殊提孩嬉笑共里閭翩若丹穴雙鳳
雛下覽德輝瑞唐虞又若汗血天馬駒奮迅宜與駑駘
俱南遊百越北燕都惾惾切切相友于志堅金石矢弗
渝管鮑陳雷張范如寧競錐刀較錨銖謁來婁江住斯
須城南新僦宅一區前槐後柳蔭屋廬草蔬同飯步同
趨嘅彼末俗肆覬覦附勢逐利情愉愉刎頸之交漢耳
餘反面仇敵良可吁以柳易播忠誠孚高風千載敦薄

汙歲寒松柏知後枯好事繪寫開新圖我作歌詩匪徒
諛願子善保慎厥初

戊戌紀事次韻顧玉山

君不見天馬來鳳之頸龍之頭五花聯娟雲凝膚朝燕
暮越歷塊過奮迅豈畏川涂迂蹇予駑劣材結髮學讀
書到今居無廬出無驢上不能遊說捍闔下不能懋遷
有無窮欄風雨四壁立簞瓢屢空恒晏如丙申春海虞
山岳之榆況乃江左乏夷吾攜妻挾子苕谿居苕谿野

老起荷戈豈識尺籍共伍符舳艫銜尾一旦潰疆梁脫
走庭羸誅山川異故里焉敢嗟馳驅思欲南入杭之郭
奈爾囊空擔石儲浮雲蔽白日安得大風起飛揚為埽
除漢家養士三百年豈無忠義者肝膽塗地捐身軀黎
民流徙困征需班荆坐太息忽報兵入湖紅旗張空半
天赤勇銳遠過馮子都所至撿刮無遺餘倉皇問歸路
扁舟隨釣徒朝行暮泊畏呌呼三日喜抵婁西隅下榻
借玄館蕭然罄儲須鄰翁走相覓慰勞生嗟吁時當春

夏交纖月明金樞青鐙對兒女始得忘艱虞海東大舶
驅萬夫歛然而來縱壑魚軍聲震地撼八區築城高高
峙諸胥奔逃竄匿紛在涂裹飯朝出如趨虛冒雨荷蓑
笠移舟繫槐榆我民日困兵日憤不分奇正啓與胙運
籌決勝千里外斯人未必能枝梧漫道不如歸去好苦
竹嶺頭啼鷓鴣歸來惆悵百感集屋廬瓦礫田園蕪田
園蕪縣官尚索租腴剝膏血向倉輸獨有東家米粟紅
腐玉帛滿帑因能舞文肆貪汙明珠買小妾奉酒歌吳

趨那知斬伐到木石千村萬落皆逃遁所以杜陵杜愚
谿愚饑驅竄遂竟不偶安得從龍躍天衢去年八月下
明詔力貧買醉眠酒鑪減民田租半雨露蘓槁枯祗今
隴畝中豈無昔時之鳳雛釋耕汲脩綆抱甕灌園蔬春
初翩然上會稽歷覽俯仰同樵漁時歌短歌擊唾壺山
橋野店隨意沽放曠不為禮所拘昔人金谷貯綠珠綠
珠墮樓園已墟豪華銷歇逐流水落日空啼頭白鳥淫
佚古所戒靡不謹厥初緬彼先哲士希聖作範模步武

青雲中繡衣緣偏諸亂離洶洶惟尚武何人英雄起狗
屠不聞漢中興天王鎮坤輿天馬來應瑞圖生民凋瘵
喜再蘓嗚呼生民凋瘵喜再蘓願同田翁野老擊壤鼓
腹歌伊鳴

題姜養浩寄顧玉山詩後

虎頭少年才且賢俠遊不減杜樊川善和牡丹天下白
看花走馬春風前東家蝴蝶西家去雙雙高飛向何處
尊前一曲斷腸詞荒草寒烟暗平楚

李嵩四迷圖

四迷粉圖誰手寫乃是錢唐之李嵩
嵩當三朝應奉日點染人物猶精工
建炎已後和議定歲聘襍沓金源東
自茲民不識戈甲江南花柳春融融
寬衫大帽脩眉翁低頭高揖身鞠躬
柳娘緩帶竟莫顧姓名却倩長須通
阿鬟雙手向前起傾身送酒如當熊
就中老奴增意氣鯨吸不覺金尊空
平康巷中月皎皎溫柔鄉裏花叢叢
寶釵斜欹粉胸露如此良宵偏惱公
蜀絲錦障仙凡隔微

見凌波羅韞弓更呼博塞相娛樂靚粧夾座分青紅玉
盆骰子呼五白百萬一擲逡巡中錦裾繡袂金條脫瑤
環瑜珥珠玲瓏梟盧不成戰屢北袒跣抱膝心忡忡兩
生格鬪氣勢雄手挾長劍星流虹白日衡行都市裏麗
豪不數漢秦宮翠鈿委地花狼藉哀情已多樂未終古
人圖史置左右善者可法惡可攻耽淫鬪博古所戒意
匠彷彿箴規同小牕展卷增感慨蕭蕭暮雨鳴踈桐君
不見周家帝業八百載太任遺澤何麗洪又不見孟光

齊眉躬井臼釵荆裙布歸梁鴻嗚呼聖賢不復作幸有
遺跡傳無窮要知稼穡慎厥本嵩兮嵩兮何不圖陳無
逸兼函風

禱雨詩為陳應辰鍊師賦

已酉季夏天亢陽木槁草悴黍稷黃黔藜蒲伏號穹蒼
如瞽無相何張張有司駿奔走郡望女巫舞雩紛浩倡
箕畢樵燎光載明閉陽崇陰禳門行精誠不格天夢夢
共犧行空火雲揚安得天瓢酌天潢淨滌炎歆化清涼

玄都中人衣朱裳服食太和日月芒赤子罹毒未渠央
起叱風雷拚賜光紫鷲赤雞飛符章檄召皓靈三山宮
深鈴擲火萬騎驤玄冥前驅回祿藏豐隆屏翳翼兩相
少女風來舞商羊陰雲四合大雨滂槁者溇然枯者生
奚用暴巫及赫阼至人無為道自充積精所致與天通
故能弭菑毆厲陽我歌烏足為報貺願子長年身受慶
蘓文忠公木石山谷題曰遺墨雖存萬事非白頭
添我數莖絲晚來天柱倚空碧却似金門初見時

崇寧乙酉五月廿八日皖口舟中作

東坡先生白玉堂嬉笑怒罵皆文章南遷再謫過儋耳
笠屐行歌烟瘴鄉平生節義應自許曠若烈日當空明
一朝騎龍居帝旁遺墨散落人間藏經營意匠入遐思
掘筆風雨翻濤江金鏃飲羽猛獸伏鏃網出海珊瑚長
白頭門客太史黃掛席皖口南風涼仰瞻天柱嗟往事
二十八字鏘琳琅兩公書法宗鍾王龍跳虎卧鸞回翔
如何宣和不見錄有媿京下名相望昔陪外史龍井陽

壁間墨君兀老蒼祝融騎之上天去撫卷興懷憎慨慷
文湖州墨竹蘓文忠公題其上

清貧太守石室翁渭川千畝藏其中理閒舐筆盤薄羸
兔起鶻落無留蹤雨梢晴葉各殊態揮洒位置分纖穠
鍾峰隱居撥鐙法氣韻生動將無同墨君一派來自東
轆材當萃彭城公平生知己最親厚走書嘲戲言春容
陳州官舍示長舌談笑化去當元豐嗚呼二老不復作
空瞻遺墨翻鸞龍

送人之番禺

秋風夕起鴻鴈翔金井露涼梧葉黃攬衣待旦不遑寐
明月皎皎夜未央問君客遊向何方言徃百粵窮炎荒
浪波沄沄一葦杭西湖彭蠡越章江輿轎踰嶺梯重岡
僕夫下上如鳥旂番禺在昔財賦疆尉佗稱王兵力彊
百年五世已陳迹荒臺草露霑衣裳野芳潤卉吹天香
蠓房柱蝨羅柳漿飛鳶跼跼海氣蒼覽古馮高興慨慷
蹇予局促馬在柳安能與子同徜徉羅浮勾漏令乞得

丹砂煩寄將

篆冢歌

雲間善篆以所書草瘞之細林山中題曰篆冢爰來
徵詩遂賦長句以寄

庖犧卦畫龜龍出頡誦造書鬼夜泣俯觀鳥獸蹏迤跡
依類象形文字立以迄三五咸東封改易殊體靡有同
周官保氏教國子六書大義開羣蒙太史籀文古少異
小篆雙省由秦始倉頡爰歷博學篇三家著述初傳世

秦燔經籍獄訟熾乃尚隸書趨約易古文雖絕漢草行
尉律學僮乃課試東閣祭酒太岳孫夙嘗受業賈氏門
閔悼俗圖昧所向博采籀古加討論揭示上下明指事
轉注假借形聲意立為一端亥畢終分別部居不襍廁
亘千萬古知字源昭若列星麗躔次中興斯學曰陽冰
入室操戈胡背戾二徐訓釋沿江河仲也祛妄言不頗
徐楚金著祛妄辨李陽冰之誤吳興張有爾傑出復古正俗訂舛訛布
衣道士錢唐住玩世端如郭忠恕三十六舉僅成編蟬

蛻遺蹤不知處席中加帶惡安西鼓皮離禹良可吁漢
家去古尚未遠成臯印文猶重摹雲間讀書苦嗜古手校
科蟲辨魚魯明牕淨兒風日佳臨摸一埽千番楮商彝周
鼓真吾師螭扁沈著沙畫錐鸞迴鳳翥龍夭矯長戈短
劍相交馳書草日積充棟楣保愛何啻壁與珪細林山
中一坏土綳笈緘滕重閉之於乎襖帖藏玉匣終致溫
韜舉菜鍾亦恐虹光夜燭天定有竊開窺筆法冢頭草
鳴寒蛩薶文瘞筆同高風後三千年見白日好事應營

馬鬣封

題黃侯子正盤松畫壁

高景山中十八公輪囷偃僂何龍鍾蒼髯貞操凜冰雪偃
卧丘壑辭秦封穀城之老黃石翁左右馳突兩石弓短
衣疋馬射猛虎解后一見傾深哀別來相思形夢寐素
壁幻出支離容不材匠石雖見棄擇蔭麋鹿還相從社
櫟固能齊上壽漢柳徒解瞑東風昔遇剡源為作傳今
託妙墨垂無窮方當文軌四海同草木猶霑雨露濃他

年奉詔寫王會圖形共進蓬萊宮

題金人張珪蘆鴈圖

金源畫馬惟李早亦有張珪善花鳥寫生八鴈蘆渚邊
眼中彷彿龍河道雙飛雙栖囓囓宛頸求其雌大澤雪
深一丈許蹤有繒繳將奚施

謝陳彥廉惠綿

三吳蠶繅甲天下陰陰百里連桑柘鳴鳩拂羽戴勝飛
曲箔爰施堦廬舍春陽煦姬子漸肥摘花汲水奉浴時

終朝內薄在懷抱宛若玄螭初生蚺弱翎輕拂籬筐內
早涼風戾柔桑脆梢杌烟濃簾幙垂三俯三眠將委蛇
簇上澱澱秋蓮房功立身廢繭如霜欄灰浼水實澤器
繰絲緝續寒冰光古者築宮臨水曲大昕之朝君乃卜
繰三盃手布三宮黼黻文章成祭服又聞炎漢中興年
蕭條千里無人烟羣兎掃蕩已滅跡野桑成繭櫓生田
祗今風塵清海寓五日一風十日雨深村何地不桑麻
青銓比屋聞機杼我耕且學居巖阿兩髻刁騷柰老何

短布單衣才掩骭飯牛扣角病身多楚夷撫巡江上
屯三軍皆如挾纊溫古來壯士樹名節感慨能忘一
飯恩

題丘魯山小象

魯山道人巢許倫目爛巖電氣吐雲瘦筇橫策走逡逡
長歌青天風動羣不燒凡鉛化黃銀不書符篆役鬼神
亦不漱醪玄和津東窮滄溟看揚塵西登維嶺踰峨岷
歸來轟飲驚市人莢花一實三千春

題茅澤民臨董北苑夏山圖

羣山廻抱中絕谷萬木陰森嵐氣溽知有逃名隱者徒
捫葛扳蘿結茅屋北苑風流去不還尚留遺墨在人寰
含毫伸紙能摸寫優孟商歌抵掌間

題茅澤民蟠松圖為陳彥廉壽

太丘仙人初度日高景山前覽秋色才名不減鄭廣文
百年纔過三之一

時年三十三歲

長松卧地數百弓全生不與

杜櫟同蒼髯鮐背冰雪操根有虎魄燕支紅茅君欲駕

茅龍去為貌蜿蜒入囊楮蟠桃再食河再清遲子披圖
重延佇

題張子政黃大癡松亭高士圖

大癡老人天下士結客俠遊非畫史酒酣潑墨寫荆關
咫尺微茫數千里笥泉頭鶴上仙空遺寶繪人間傳
弟子顛張早入室重岡疊嶂開雲烟太山斗絕何由緣
下有鳥道丹梯懸此中疑是避秦處仰見茅屋巖崖邊
松亭蒿目者誰子耳譖流泉橫綠綺不知捷徑在終南

每逢佳處輒留止我生亦有山水癖
吳楚燕齊徧遊歷風塵瀕洞難再往
坐對此圖三太息

題周原素臨趙文敏公十六馬

宋諸王孫面如玉書法鍾張畫顧陸
寫唐內廐十六馬筆精墨妙天機熟
憶昔岐邠開八坊四十萬匹皆駿良
平原牧放樂字育泉甘草肥筋力強
豐水東注波湯湯柳花吹雪桐陰涼
平頭奴子騎先出兩奚控勒臨隄傍
騅駟駐駱驛驪黃徐驅馬儼若驂
鴈行有驂却立不敢進

畏前反蹴頭高昂三馬欲復俯飯水一馬已渡將騰驤
中流夭矯乃龍種兩耳批竹雙瞳方斯圖已歸羣玉秘
夜夜長虹光燭地何人援筆解臨摸吳郡周生富文藝
中原板蕩徧荆榛千金駿骨化黃塵摩挐老眼明牕側
展卷題詩一愴神

送田起宗回泉南次倪雲林韻

烟樹望中迷春流接斷隄東裊遲明發攬衣聽曉雞
蘼蕪綠徧江南路蒲颿風輕雲外度香閣無人占鏡聽
倚

門應念來何暮花落野桃紅雨飛春鴻社燕故相違白
頭慈母高堂上綵服稱觴春日暉

送孫惟善之廣東次倪雲林韻

綠遍江上草遊子涉遠道雪消春澗花滿岡南越三吳
俱異鄉桂林波生赤鯉肥涼風蕭蕭透絺綌華開黃菊
行將歸

謝伯誠所藏王叔明狼山圖

憶昨鼓楫遡大江海門一點狼山碧安得振衣躡層巔

東望扶桑初日赤忽見此圖心目明石壁鏤削苔花青
仙翁白狼不復見金銀佛宇開岩扃上方臺觀雲中起
下瞰疆濤千頃水平原宅相放舟過吮墨含毫柁樓裏
江南有客願而長夢覺池塘春草芳生平愛画久成癖
題詩緘封遥寄將千古風流猶未弭翩翩王謝佳公子
日暮相思江水深獨立汀洲折蘭芷

題茅澤民壁上松石

昔人画松妙入神畢宏韋偃及張藻宋三百年惟李成

石磴烟林更深窈近世首推文敏公尚書雲山氣勢雄
後來作者黃岩李脩篁古木岡巒重中吳江南佳麗地
前輩風流猶未墜忽驚素壁走蛟螭乃是茅君醉遊戲
大者昂霄梁棟材根穿石罅貫鐵鉤稚者新承雨露厚
密葉曾栖鸞鳳來是中亦有支離叟欲同杜櫟齊上壽
不材固可全天年鐘鼎由來異畎畝軒中之人讀韋編
坐對松石心悠然焚香寓目竟白日默究未盡羲皇前

送市舶官

諸蕃之國南海陰島居卉服侏僑音雕題椎結金鑿觀
獷驚如獸那可馴稼穡萬斛檣林林夏秋之交來自南
象犀翠羽珠貝金蘓合薰陸及水沈皇元率土罔有刑
三邊擾攘興甲兵梯航梗阻民弗寧重臣分間號令伸
殊方慕義相附親訶叱鯨鯢驅鯢鯨海不揚波如砥平
婁東太倉吳要津襟帶閩粵控蠻荆賈胡夷蜚貢賁琛
闕譏互市什一征撫綏覆育德澤深猶慮苛細失厥心
夫君矯矯東南英溫恭廉潔邁等倫承命監眎慎章程

兩周星霜秋復春長涂蕭蕭征馬喧回轅不載惹茲行
夫君夫君明且清自茲步武趨王庭上陳民瘼據忠誠
願化愁歎為驩聲

滄江月色圖

水寒月明天蒼蒼欲落未落夜未央足扣兩舷歌滄浪
金粟圖中見真跡中岳外史美冠裳

江臯木落江月明坐擁錦袍調玉笙吹作昆丘雙鳳鳴
順流東下莫蕩漿好逾弱水窺蓬瀛

晚節軒茅澤民畫壁次韻倪雲林

前輩風流嗟已矣，看山畫裏覺然喜。
石脚下插江水清，烟嵐杳眇羣峰峙。
玩圖安得隨漁人，桃花源上秦時民。
草木叢深蹊徑遠，溪水春波花鳥新。
一塵隔斷那能往，勝地雖遠神偏親。
清詩憂玉題壁畫，森列琅玕共琪琬。
福地蕭森雖只尺，側身東望嗟風塵。
魚牙異香尚留意，得與不得寧須嗔。
澤民許惠羅斛魚牙未至何如晚節老居士，默究不二心。
尤勤綠衣行，酒列孫子高軒窈窕當南閨。
人生

會合良有數飄散倏忽如烟雲重來握手成大笑滄溟
水淺三千春

黃大癡雲山圖

荆浩闢全善山水大癡繼作非俗史技藝畢給世稱賢
圖畫乃其餘事耳筇箕泉頭月蒼蒼蟬蛻穢濁凌風翔
斯人九原不可作泚筆題詩增慨慷

樵風軒為鄭生賦

鄭生城居苦迫窄一軒下榻聲吾伊庭前書帶經雨潤

堦下山簷含露滋吾聞白鶴山前削立青芙蓉絕頂中
有仙人居金堂石室相縈紆樵翁采薪得遺箭笑授覓
者心勤渠仙亦懷私施狡獪旦南暮北風徐徐我登樵
風軒為歌樵風謠婁江東下何滔滔碧波鏡涵天宇高
願風捲水化甘雨淨洗海內無炎歊

題任月山圉人調馬圖

邠寧八坊全盛日牧馬四十餘萬匹玉闕沈櫪野無塵
奮鬣長鳴氣驕逸就中一馬如游龍兩目夾鏡磨青銅

圉人騎入橫門道霜蹠蹠雪生長風水衡昔閱羣玉秘
摸得茲圖落人世海桑陵谷雖變遷猶是靈光歸然峙

贈葛進善

繫昔炎帝神農氏品嘗百草醫藥始軒轅代起征不附
浮化草木及蟲豸乃延岐伯講至道推研疾病死亡理
靈樞玉函素問書剖析絲毫明要指維秦越人太倉令
用之攻疾良有以下逮炎漢長沙張論辨傷寒分表裏
魏晉徂唐不乏人脉經本草咸述紀金源卽金刀最良

志復古學拯頽靡再傳戴人術亦神後來繼者東垣李
用藥攻守勢雖殊異路同趨無遠邇遂令末學知所歸
邇派尋源終及委緬被規規守局方仿若刻舟求劍耳
婁東有客稚川裔尚友前修敦素履白晢豐下頤而長
蒿艾之中見蘭芷去年挾冊觀光遊門外求醫日成市
太史雄文特筆褒五色雲霞光墮地里人曾生客他郡
觸暑長涂行不已黃塵眯目口生烟垂泚致疾幾不起
竭來一視曰無虞投以囊中方寸匕煮而食之俄頃間

外熱已弭內泄止舉家感德何以報索我長詩當紈綺
詩成寫贈媿不工願保貞名垂信史

張蒙軒善製篆筆遂隳括毛穎傳以贈

毛穎氏中山人其先明眎者佐禹治東方居卯地死為
十二神神明之後吐生子孫八世有鬯當殷時得仙術
匿光使物八月騎蟾蜍厥後不仕為隱淪狡而善走東
郭競乃與韓盧互爭能盧共宋鵲謀醢其家及其身始
皇伐楚思兼并蒙將軍恬將三軍軍次中山大畋獵筮

以連山其兆得人與人文今日之獲不角不牙被褐倫
八竅長須而缺脣取髦資簡牘天下同書咸祖秦遂圍
毛氏族拔毫載顙加束縛獻俘章臺宮上乃命恬賜之
湯沐封管城寵任日見親彊記便敏工纂錄近悉當代
遠結繩上自始皇帝太子丞相下黔首無不愛重同討
論曲直巧拙善隨意雖見廢棄默弗呻惟不喜武士見
請時一臨累拜中書令呼為中書君上親決事衡石程
宮人不得立左右獨顙常侍至夜分陳玄陶泓褚先生

出處則必偕友善相推稱後因進見任使令拂拭之頃
謝免冠髮禿摹畫不稱旨上顧嘻笑曰中書君今不中
書不任吾用老且髡臣穎稽首再拜對斯所謂盡臣穎
心遂歸封邑不復覲日老見踈秦少恩吳人張蒙氏尚
交千載上憫穎後無聞搜羅得遺肩散處宣城之敬亭
雄豪英銳肖厥祖祇今崇文偃兵革挺身自拔著作明
光廷

殺虎行

安化縣廣文陶振作公號釣鼈叟

傳公射麋曲聽我殺虎行逐虎虎不去殺虎心始平縣
官桑侯仁且明賢哉賢哉非甯誠高風不在宋均下善
政直與劉昆并如何此物不出境傷人害畜來縱橫梅
山之南梅山北大小人家爭辟易青天白日不敢行何
況黃昏山月黑桑侯聞之怒且嘻此物敢爾強梁為為
民父母不除害百里赤子將焉依遂令弓兵設陷甯果
見此物來投機長戈如雨點短鋌如電揮戟尖不掉丈
二尺袍花已脫斑斕衣陰風一陣過墻去但覺倏鬼嚶

嚶啼桑侯亦好奇觸眼見未有急呼青衫史來喚釣鰲
叟鰲叟走欲顛驚看立良久雄姿猛勢尚依然酷似天
狼與天狗想當長嘯下南山猿臂將軍亦驚走想當獨
立向西風東海黃公方掣肘重為告曰虎兮虎兮汝嘗
跳我墻傷我羊刮吾六畜為餽糧又曾穿我壁銜我鷄
驚動老夫眠不得爾來胡為落陷中百步可再生威風
桑侯爾嗔不汝容汝惡貫盈殲汝躬于戲猛虎不足言
桑侯良可數前番曾傳舒文虎絕似白門擒呂布今番

又殺錦於菟何異山岨出馮婦城隍廟前簫鼓鳴紙灰
飛雪梨花輕桑侯長得謝山靈山人把酒來相迎酒酣
拔劍食虎肉一方之民歌太平

題龍頭畫

疾雷破山風振海黑雲捲浪天冥冥海藏龍宮晝不閉
飛出老蛟千歲精兩瞳爛爛如秋月八十一鱗寒動雪
倒翻海水散飛花直擁冰髯上寥沕想當盤礴欲盡時
辟歷一聲轟硯池初疑延平寶劍化又似雷澤神梭飛

畫師亦無數此本真妙手點晴不讓僧繇先落筆寧居
所翁後江西胡公欣得之價重驪珠三百斗重為告曰
龍兮龍兮汝之頭角何嶄然風雷變化在眼前願將天
瓢靈物洒洒作甘霖百萬里淨洗海中清氣烟八荒稼
穡秋滿田老農擊壤歌豐年

耕學齋詩集卷七

欽定四庫全書

耕學齋詩集卷八

明 袁華 撰

律詩 五言

夜泊澱山湖有懷鐵崖先生

鼓楫淞上游輕颿度涖洲對月耿不寐懷人殊未休
征鴻唳沙磧微風生柁樓澱山青一點龍氣落船頭

杏林圖

董君遜世士高居廬阜山神方傳肘後丹杏滿林間采
藥猿持鑷看書虎抱關畫圖留好事遺韻邈難扳

送于彥成歸越中

楓橋明積雪曉發剡溪舟獨鶴橫江去三山接海流綠
尊傾乳酒白髮暎霜鷗天姥雲門路曾同上客遊

見山樓

窈窕飛樓上天然圖畫開雲從桐井起水向柳塘回素
月流書幌青山落酒盃何時同遠眺與子一徘徊

甲午歲丹陽道中即事

覽古丹陽郡興亡幾戰爭山橫季札墓江轉呂蒙城壞
壘烽埃赤荒墟燐血明賣刀仍買犢何日事春耕

昔年梁武帝葬父在平岡皇業寺猶存蕭陵名未亡石
麟薶碧草玉鴈銜黃腸觸事多興感悲風起白楊

元戎擁貔貅開閩鎮朱方勇銳知無敵驍騰孰可當陰
謀周呂望決勝漢張良坐使風塵息論功宴未央

天設長江險悠悠萬古情烟光連北固雲氣渺東瀛夜



汎金山寺花遊鐵甕城也知狂李白乘月醉騎鯨

聞道黃連破吳儂喜欲狂渠魁竟授首遐裔盡來王洗
甲潯陽水銘功赤壁岡總戎英且武疑是郭汾陽

平糴吳東粟委輸江上游汎舟雍繼絳給餉馬連牛堅
壁雖皆破陳師尚未休將軍身許國不解蟲虺螫

遊俠誰家子操戈復父讐剽金當白晝被酒宿青樓意
氣傾京兆豪華擬列侯儻逢強項令梟首在竿頭

水軍新建節遴選盡英雄杭稻千艘發梯航四海通斬

鯨朝拂劍聞鴈夜張弓獨有玉山客參謀在幕中
婁港蒙衝發開颿駕海濤揮戈當落日殺賊竟清宵刀
剗犀為甲鞭驅石作橋何人投筆研自擬漢班超
馳驅思欲迷惻惻重悽悽去國悲遊子懷鄉夢故妻斷
溝科蚪聚灌木郭公嘯獨有平安字緘封手自題

丙申上巳夜見月思家

三月初三夜谿樓見月生雲連銀漢白星拱紫垣明野
寺鐘才動荒村鷄亂鳴弟兄俱異縣有淚似須傾

丙申歲有懷南北師友鍊崖先生

第二橋邊路問奇那厭頻文章司馬氏詩酒謫仙人
笛弄莫邪鍊尊開太古春梅邊草堂好矯首隔風塵

張師允憲僉

奉使趨庭日嚴霜委紫荆孝誠天地格忠義日星明
未弭江東節俄羅海上兵潛身向何地天末暮雲橫

富珠哩子昇經歷

問訊湖南暮黯危無使來兵戈何日息舟楫幾時回雲

夢惟空澤錢塘又劫灰相思對明月獨立意徘徊

蕭元泰先生

一從騎鶴去滄海變桑田遯世陶貞白移家葛稚川
灌園朝抱甕煮石夜分泉縮地應無術尋真或有緣

高則誠錄事

永嘉山水郡燕服帝王州獻賦長楊內從君滄海頭
阿戎終放曠小杜最風流花滿西泠路烟波渺白鷗

錢成夫編脩

金人卷八
憶昔錢塘別于今十載餘扶搖鵬鷁異相失燕鴻如代
祀臨南鎮移家賦卜居高林疏雨霽南望正愁予

于彥成鍊師

前朝將家子學道越山中賣杏虎收穀吹笙鳳集桐
夷能貨殖處士本英雄禹穴藏書處瑤文玉檢重

學性海講師

雲扉景氣清魯聽話無生丈室文殊座雙林舍衛城
龍泓循故道寶殿麗新覺聞說胥江口袈裟渡晚晴

秋夜

中庭坐深夜詩思與秋清
零露沾衣濕流螢度竹明
酒盃嗟量減烽火喚愁生
斷送淒涼好西風鼓角聲

種玉亭

種玉新亭下移來嶰谷中
幽根留宿土醉日動微風
杖化龍飛雨笙吹鳳下空
道人參玉板避世隱牆東

挽錢崖先生

昔客錢塘日曾陪杖履行
授經終卒業問字屢稱觥
南

國衣冠遠東維砥柱傾平生三史辨大義日星明

瞿允同夢待其考野逸翁有鳥飛集其肘遂名其

堂曰夢鳥

憶弟春吟草思親夜夢鳥栖冠旌子孝集肘慰兒孤失
喜承顏色含哀詠畢逋升堂觀返哺感慕重長吁

題倪雲林山居圖

地僻無輟跡知為靜者居山泉激石駛巖樹覆牕虛洗
藥坐濯澗負苓行讀書茲丘儻可老吾欲樂耕鋤

夢草池為謝伯誠賦

幽居絕蕭爽新綠冒芳池
南浦春還日西堂睡起時
弱鱗依密藻莠甲冒遊絲
矯首思公子扳援玉樹枝

渡吳松江

三江東海入渺渺際天浮
魚鱗松陵市珠犀滬瀆舟
季鷹終託興魯望舊追遊
自媿猶馳逐臨流羨白鷗

次韻埴大章梧竹軒聯句

會合維摩室微風滿榻秋
雲龍韓孟句冰雪澈休流
洗

艤桐陰落鈎簾竹影浮干戈雖在眼慎勿賦登樓

聽雨舟

枕書篷屋底卧聽雨聲秋蕭瑟芙蓉渚淒涼杜若洲何
人遊赤壁無夢過黃樓欲覓鷗夷子江湖渺白鷗

賦得金錫送文起周

開士金為錫飛行向日邊穿林鳴落葉卓石湧清泉天
末龍同往雲間鶴共還始知木上座曾悟夾山禪

題倪雲林所寄陳彥廉春草軒圖

彼美陳徵士幽居愜素心字臨張旭帖

彥廉所藏
張旭帖


詩詠

孟郊吟老圃秋花瘦閒庭春草深寫圖并琢句持寄自

雲林

倪雲林同集

雲林邀世士詩酒日陶情灑墨寫蟲篆放歌揮兕觥庭
下幽花吐階前䟽雨晴不愁江路永扶醉出重城



耕學齋詩集卷八

欽定四庫全書

集部

耕學齋詩集卷

九至
十二

詳校官庶吉士臣龍廷槐

中書臣劉源溥覆勘

總校官進士臣繆琪

校對官編修臣莊通敏

謄錄監生臣莊文煜

欽定四庫全書

耕學齋詩集卷九

明 表華 撰

排律

送殷孝伯之咸易教諭三十六韻

聖代崇文化賢良起草萊鳳鳴陽谷日魚躍禹門雷匠
石無遺棄洪纖存剗裁咸陽秦赤縣博士楚宏材話別
嗟吾老橫經羨子才渡江淮浦迥沂潁蔡河開紅樹迎

官舫黃華暎酒盃紀行應俊逸覽古定徘徊遵陸由梁
苑馮虛自吹臺汲京城屹屹艮岳石巍巍蹋月車鳴鐸
嘶風騎卷埃吳音愴父訝儒服虜人猜應為青山住知
懸白日隕解鞍依近郭縱馬盡枯荻風急狐狸嘯天高
鴻鴈哀詩情秋共澹鄉夢曉同催喜見烽烟息愁聽驛
鼓槌虎牢悲戰骨緱嶺覓仙胎岳仰嵩高峙河看砥柱
栽山川猶鞏固風物亦奇孩雞唱函關啓龍飛太華來
碑亭矜漢好浴殿弔唐灾望極吳天末行窮渭水隈別

家傾菊釀到縣動葭灰多士爭先逐諸生獲後陪獻蒞
芹實豆舍菜酒崇壘五傳遺經在三餘萬卷該尊王明
大義抑伯黜渠魁寒榻臯比設朝槃苜蓿堆樹萱思奉
母援柱念提孩有弟能調饌何郵不寄梅五陵還突兀
八水自縈迴選勝筇扶手遐觀笏拄頰壞基留宿草斷
礎長荒苔異域多佳處茲遊寔壯哉丈夫四海志肯使
寸心摧

次韻諸葛用中歸真觀三秀亭紀興

舟次蒙城驛名山未暇登歸真聞有觀覽古豈無朋小
逕松間入危闌竹外凭亭標三秀異境勝萬人稱玉氣
朝凝潤霞光曉散澄雲房通曲密藻殿肅嚴凝濟勝資
佳具扶顛藉老藤未能忘臬兀豈敢肆驕矜長嘯孫登
解躬耕諸葛能華林散鹿跡斷港聚漁罾九醞浮鸚鵡
三花覆甃潭清容可鑑谷響語還磨石上便清坐松
根稱曲肱愧予才潦倒羨子思川騰擾擾磨旋螳營營
棘止蠅四三狙賦芋九萬海搏鵬獨客仍踈懶頑仙絕

愛憎行歌采芝曲歸理讀書鐙空谷懷佳士孤雲愧野
僧賦詩慙繆拙聊以紀吾曾

陳李子發解歸席上分韻得三字

明詔初登士賢良起朔南太丘雖楚士厥貢逐吳柑
昆玉連城重驪珠赤手探桂板仙窟一浪擊禹門三突陣
神初王衝圍戰始酣搞文陳禮樂射策黜奸貪歸日逢
重九高朋喜盍簪黃花映朱寔紫蠅間銀蚶酒瀉盃中
綠風生席上談明年京國路春水染袍藍

送李同知

授節明光裏分符淮海潯家傳三禮學夜絕四知金蜀
郡流芳遠鄱陽種德深熬波輸國賦剔蠹慰民心海王
夷吾策徒謳子產黔政成還治所撫事動遐吟

送葛進善遊金陵

抱朴諸孫負異材丹成直欲訪蓬萊高堂霜鬢雙親老
遠浦征颿一舸開山入金陵雲鬱勃江環鐵甕瓦水縈洄
鵝黃色上官牆柳鄂綠香飄禁籞梅獻賦定趨鵷鵲觀

題詩擬在鳳凰臺少微光動三台近重譯音翻九域來
正旦迎春仙仗集端門待漏曙鐘催公車獨數嚴徐學
戰國猶稱范蔡才直節事君真不忝高懷絕俗又何猜
拾遺杜曲詩千首逆旅新豐酒一杯威鳳已巢阿閣日
神魚終化禹門雷他時駟馬歸鄉里錦繡宮袍次第裁
鄭德明李廷璧同集顧仲瑛書畫舫分韻得天字
我愛山中屋似舩曲闌倒影水行天盡推鄭顧同三絕
書至鍾王可並傳把觥俄驚天欲雪鉤簾恰見月初絃

黃浮鞠藥鵝兒酒紅芰椒花玉鬣鯢北苑風流猶謾仕
南宮放曠任稱顛栖烏驚柝翻叢竹潛鯉聽琴出九淵
山擁雪巢吟木客樓居雲海宴神仙
莫惜狂歌醉扣舷
時會合須強飲

徐種雲檢校湖光山色軒

湧金門裏春如海虛閣亭亭瞰水涯
畫棟留雲高縹緲
雕闌轉月澹交加
杜陵萬里橋頭酒
賀監千秋觀裏花
樹樹芙蓉園別港
雙雙鸚鵡聚員沙
遊絲趁雨縈紅樹

香霧隨風度碧紗
隨水荒涼安足數
郎官空濶未容誇

牕舍嶺雪通三島
塵遠壺天貯九華

所藏靈碧石
號壺中九華

歸去

漁舟聞欸乃
坐來樗馬絕喧譁
自緣丹宸曾投策
應用青門學種瓜
始信登瀛元不遠
銀潢從此汎仙槎

耕學齋詩集卷九